

Leidse charters van de Pancraskerk betreffende Zoeterwoude en Stompwijk.

bewerkt door

Antonius van der Tuijn

Inventaris 502-826

Regest 846 d.d. 23-06-1358.

Wi Philips Jans soen ende Pieter van Hairlem scepen in Leijden doen cond allen luden dat quem voir ons Dirc van Hairlem Dircx soen ende gheliede dat hi vercoft heft veren Truden Houdijns wedewe van Zwieten achte morghen vier hond ende een half hond lands, die ghelegghen zien in den ambocht van Soeterwoude ende Dirke voirscreven aen besturven zien van een (sode?) zin zwegher doot. Ende plaghen Willaems van der Hare te wesen ter goeder ma... Ende Dirc voirsz. ende Jan Ghereds soen hebben belovet mit ghezamender hand ende elc van al te waren dit land voirsz., jair ende dach alsoe recht is ende als men een volboden vrij erve scondich is te waren. Ende Dirc heft him dair of belijet, betaelt den lesten penning mitten eersten. Ende hi heft Janne voirsz. belovet scadelois te houden. In oirkonde desen brieve beseghelt mit onzen zeghelen. Ghegheven int jair ons heren 1300 acht ende vijftich op sijn Jans avond te midzomer.

Inventaris 502-827

Regest 1015 d.d. 03-05-1370.

Wi Dirc Poes Jan Pieters soen zoen ende Aelbaren Philips zoen scepen in Leijden orconden dat voir ons quam Dirc van Hairlem Pieters soen ende ghelijede dat hi vercoft heft bi Jans Hant van Leijden, Dieric van den Werve ende IJsbrant Pieters kinder van Leijden sinen neven (bij...) Cruijsmade die groet is twischen vier morghen lants ende (bijnnen) in alder manieren ende recht als hi dit lant (...nt) heft van Jan Gherijt Heijnen soens zoen, eer Pieter van Leijden die manscip dair of cofte ende nu ghecoomen es op Janne voirsz. Wilc lant voirsz., ghelegghen es inden ambochte van Soeterwoude op Waddingher Vliet. Ende belegghen heft dabt van Egmond allanghes die zuutside, dat lant dat Heinrich Gherijt Hoestraten ende Heijmockers tsamen plach te wesen allenghes die nortzide, Wouter van der Bregghe dat oestende ende des jaghers lant dat westende. Ende dit lant heft Dirc van Hairlem voirsz. beloeft Dirc van den Werve ende IJsbrant sinen neven voir (...) te waren van allen commer Diert op wesen mach jair ende dach alsoe recht is, op anders al sijn ghoet, sonder van sulker manscip alst voirsz. staet. Ende hi beliede hem of voldoen ende al betaelt bi Heijmocker van der kinder wegghen voirsz., den lesten penning mitten eersten. In orconde dezen brieve bezeghelt mit onzen seghelen. Int jair ons heren dusent drie hondert ende tseventich des vrijdaghes na meije daghe.

Inventaris 502-828

Regest 1092 d.d. 25-02-1373.

Ic Dirc van den Bossche scout van Soeterwoude doe cont allen luden dat ic dair over ende bie was alsoe een rechte mit den aziche ende mit den buren van Soeterwoude daer Vranc jonghe Jannen soen over gaf ende op droech vrilike alsoe die aziche wijsde dat recht is heren Hughen van der Hant priester achte morghen lants legghende in den ambocht van Soeterwoude in Claes Godevaers soens weer bi der kerke legghende in ghemengheder voer mit lande dat Grieten Hoven wedewe toe hoert, streckende voer over den wech an Florijs lant van Raporst ende after in die meer. Ende Vranc Jannen soen voerseijt beliede him van desen lande voernoemt betaelt ende voldoen, den eersten penninc mit den lesten. Voert soe was ic daer over alsoe een rechter mid den azighe ende mit den buren van Soeterwoude daer Danel Jacobs soen over gaf ende opdroech vrilike alsoe die azighe wijsde dat recht is heren Hughen van der Hant priester voersz. achte morghen lants, legghende in den ambacht van Soeterwoude. Ende ghelegghen sien in enen weer lants dat hiet tSnelle weer in ghemengheder voer mit lande dat toe hoert Griete Hoven wedewe voersz., Jan horen sone ende Claes Hoven soen. Ende belegghen heft an die zwt side heer Pieters capellanen van Leijden in ghemengheder voer mit Dirc van Zwieten ende an die noortside Griete Hoven wedewe voersz. mit Jan horen zoen voerghenoemt. Ende Danel Jacobs soen voersz. beliede him hier of voldoen ende betaelt, den eersten penninc mit den lesten. Welke sestien morgen lants voersz. heer Hughe van der Hant voerseijt deken van sinte Panraes kerke te Leijden opdroech ende over gaf voer nu alsoe voer rechter voer den aziche ende voer die buren van Soeterwoude (alsoe Jan die Coster, Claes Jan sniders soen, Willaem (...es) soen ende Claes Aems sone) mit recht ende mit vonnesse alsoe die asiche wijsde dat recht is der kanesien van sinte Panraes kerke te Leijden in bewisinghe tot sijnre kanoninx proven die hi ghesticht heft in

der kercken voerscr. In oerconde desen brieve bezeghelt mit minen zeghele. Ghegheven int jaer ons heren duijsent drie hondert drie ende tseventich des vridaghes na sinte Mathijs dach apostel.

.....
Inventaris 502-829

Regest 1114 d.d. 07-02-1374.

Ic Martijn Hoven soen doe cont allen luden dat ic vercoft hebbe den deken ende den capittel van sinte Panraes kercke te Leijden twee marghen lants, ghelegghen in den ambocht van Zoeterwoude in een weer lants dat hiet dat Snelweer. Van wilken weer al dat ander lant te voren toe behoerde ende toebehoert der canesien voersz. Ende dese twee merghen lants voersz. love ic der canesien voersz. te waren vrij ende commerloes, jaer ende dach als recht is ende men een vri eijghen volboden erve schuldich is te waren ende allen commer, toesegghen ende aencavelinghe of te doen diet nu ter tijt op wesen mochte. Ende ic bekenne van den lande voersz. vol ende al betailt, den lesten penninc mit den eersten. Ende want ic selve ghenen zeghel en hebbe, soe heb ic ghebeden Claes Hoven soen minen broeder ende Dirc Coenen Mathijs soen dat si desen brief over mi ende voer mi bezeghelt hebben. In kennesse der waerheijt. Ghegheven int jaer ons heren 1300 vier ende tseventich des dijnsdaghes na sinte Aghaten daghe.

.....
Inventaris 502-830

Regest 1163 d.d. 08-12-1375.

Ic Dirc van den Bosch scout in Soeterwoude doe cont allen luden dat voer mi quam Maertijn Hoven soen ende gheliede des dat hi vercoft heeft Willaem Thessin vierdalf marghen lants die ghelegghen sien inden ambacht van Zoeterwoude op den Swijtwout mit (burtman) te mijen. Ende belegghen heeft andie zwtside Gherijt Zeverijnts soen wtghaende van den voerweghe toten Riethovels camp toe. Voert soe loeft Maertijn voerscreven desen Willaem Thessin dat lant te waren jaer ende dach als men een vri erve sculdich is te waren. In oerconden desen brieve beseghelt mit minen seghel. Ghegheven int iaer ons heren dusent drie hondert vive ende tseventich op Onser Vrouwen dach conseptio.

.....
Inventaris 502-831

Regest 1180 d.d. 13-09-1376.

Wi Gheret van Oesgheest ende Gheret Willaems soen scepenen in Leijden doen cont alle luden dat quam voer ons Willaem van Alcmade ende gheliede dat hi vercoft heft den deken ende den capittel der canesien te Leijden een marghen lants die hi legghende hadde in den ambacht van Zoeterwoude. Ende leijt in enen camp lants in ghemengheder voer mit anderen lande dat zulk den Duijtsken heren toe hoert ende zulk die canesien voersz. toehoert. Ende leijt dese hele camp niet varre buten der stede van Leijden bi Rapenburch, bi Willaem voersz. erve. Ende strecket dese heel camp mitten een ende an den dijc die voer den Rijn ghaet. Ende Willaem van Alcmade voersz. lovede der canesien voerscreven dese marghen lants voersz. vri te waren jaer ende dach als recht is ende men een vri eijghen volboden erve schuldich is te waren ende allen commer of te doen dair nu ter tijt op wesen mochte. Voert lovede Willaem van Alcmade voersz. der canesien voerscr. waer dat zake dat dese marghen lants voersz. der canesien voerscreven of ghewonnen worde binnen jaers als van nare coep, dat die selve Willaem dan der canesien voerscr. weder gheven sel vijf ende vijftich penninc hollants comans ghelts. Ende Willaem voersz. beliede him van den lande voerscreven vol ende al wel betailt, den lesten penninc mitten eersten. In oerconde desen brieve bezeghelt mit onsen zeghelen. Ghegheven int jaer ons heren 1300 ses ende tseventich des zaterdaghes na Onser Vrouwen daghe als si gheboren was.

.....
Inventaris 502-832

Regest 1227 d.d. 17-12-1379.

Vranc Michiels soen ende Jan van Leijden scepenen in Leijden oirconden dat voir ons quam Bertelmees Godevairts soen ende gheliede dat hi vercoft heeft Jan Gherijd Dircs soens soen vier pond hollants goedts ghelts tsiairs. Te versien op dertiendalf morghen lants die ghelegghen sien binnen den ambachte van Zoeterwoude. Ende belegghen heeft an die westzide Dirc Pieters soen ende an die oestzide Gherijd Zeverijts soen ende Jan die Bruijne, allen mid horen landen. Ende dese voirseijde renten alle jair te betalen tot Voircoten ende Valkenburgher marcten. Ende wairt dat Jan Gherijds soen voirseijt niet selver ghenoech en wairt zijn renten te versien an desen lande voerscr., so ghelovede hem Bartelmees Godevairts soen ende Dirc Godevairts soen dat hem Jan voersz. voit versien soude an alle horen goede, wairt ghelegghen is. Ende Bertelmees voersz. lovede Dirc sinen broeder voerscr. hier of scadeloes te houden. In oirconde desen brieve beseghelt mid onsen seghelen. Int jair ons heren duijsent drie hondert neghen ende tseventich tsaterdaghes na Lucie.

Regest 1257 d.d. 11-10-1381.

Wi Vranck Michiels soen ende Jan heren Sijmans soen scepenen in Leijden oirkonden dat voir gherechte quam Jan Gherijd Dircs soens soen ende gaf over heren Hughen van der Hant deken van der canesie tot Leijden enen scepenen brief dair dese scepenen brief doir ghesteken is, mid recht ende mid vonnesse alse recht is. Ende scepenen wijsden heren Hughen voirscr. mede te winnen ende te verliesen gheliken ioft Jan voirscr. selve wair. In oirkonde desen brieve beseghelt mid onsen seghelen. Int jair ons heren duijsent drie hondert een ende tachtich tsvidaghes na sinte Vechters dach.

Regest 1258 d.d. 11-10-1381.

Wi Vranc Michiels soen ende Jan heren Sijmans soen scepenen in Leijden oirkonden dat voir gherechte quam heer Hughe van der Hant deken van der canesie tot Leijden ende gaf over tots capittels behoef van sinte Panraes te Leijden twee scepenen brieve dair dese scepenen brief doir ghesteken is, mid recht ende mid vonnesse alse recht is. Ende scepenen wijsden alse voir vier marghen pacht lants ghelegghen in Jacob IJsebrants soens weer an die diepe Vliet. Welke vier marghen lants die deken voirsz. voirtijts den capittel voirscr. oghedraghen heeft tot sinen mensuael. Ende noch mid desen brieve overghift den capittel voirghenoemt mede te winnen ende te verliesen gheliken ioft die deken voirscr. selve wair. In oirkonde desen brieve beseghelt mid onsen seghelen. Int jair ons heren duijsent drie hondert een ende tachtich tsvidaghes na sinte Vechters dach.

.....
Inventaris 502-833

Regest 1381 d.d. 22-01-1460.

Hughe van der Hant deken in der canesie te Leijden doen cond allen luden dat wi overgegeven hebben ende over gheven mit enen vrien wille onzer canesie ende capittel voersz. alze tot onzen mensuale ende memorie mede te doen een warf in elker maend van den jare voer ons ende memories meesters Andries zielen tot ewighen daghen na onzer doot aldusdanighe renten ende goeden als hier na volghed, behoudelic noch vier pont toets ghelts siairs, te versien op dertiendalf marghen lants leggende int ambocht van Zoeterwoude die Jan Gherijt Dirxs soens zoen onze neve coftede tieghens Bartolomees Godevaerts zoen. Ende wi tieghens Jan onze neve ghecoft hebben ende onzen capicel over ghegheven hebben mit rechte ende mit vonnesse alse die scepen brieve daer of houden die zi onder hebben alze voer vier morghen lants die wi legghen hadden inden ambochte van Bodegraven. Ende voer tijts tot onzen mensinuale ghecocht hadden ende om oerbaer ende profijt des capitels bi horen confent weder vercoft hebben. Item noch vier pont comans pajment siairs, te versien op dat twiedeel van een weer lants in Nijeucoop. Daer Gheret Hanne Milden zoen op plach te wonen ende van ons hout in erfure.

.....
Inventaris 502-834

Regest 1283 d.d. 27-03-1383.

Ic Jacob Ghijse doe cond allen luijden dat ic vercoft hebbe heer Florijs van Alckemaede ander halve marghen lands die ghelegghen zijn inden ambocht van Zoeterwoude ende gheheten is die Brede camp die met Pieters kinder van Leijden met ghemengheder vuer ghelegghen zijn. Ende ic Jacob Ghijse voirsz. love heer Florijs van Alckemaede voirscr. alle commer ende scade of te doen dier nu op staet. Voirt ghelijc ic Jacob voirsz. den lesten penninc betailt mit den eersten. In kennesse der wairheijt so hebbe ic desen brief open bezeghelt met mine seghel. Int jair ons heren duijsent driehondert drie ende tachtich des vridaghes na Paeschen.

.....
Inventaris 502-835

Regest 1287 d.d. 12-05-1383.

Ic ende Michiel vander Heijde scepenen in Leijden oerkonden dat voer ons quam Aelwijn Claes soen ende gheliede dat hi ghehuijrt heeft jehghens heer Jan Hamer Poes soen negenste marghen luttel min of meer, legghende inden ambocht van Zoeterwoude op die Barte ende nu ter tijt Aelwijn voirsz. woenachtich op is. Ende ghehuijrt den hoep om elf pond hollants comans pajments tsairs. Ende dese huijz voirseijt sel duijren tien jair lanc, ingaende Corsmis heijlich misse in die lest verleden (soe mense dese) drie ende tachtich. Ende dese voirseijde renten ende sel men alle jaer betalen tot Voircoten ende Valkenburgher marcten in dust...gher manieren als hier na bescreven staet die Aelwijn voirsz. gheven zel Jan Hamer of sinen ghewairden bode al vri ghelt van ...den w... ende van nuwen we.... alle jaer marghen twee w.te grote dairJan Hamer scadeloes of te houden. Ende wair dat sake dat Aelwijn voirsz. m... an leijde van den nuwen w... vanden marghen meer dan twee wi... grote, dat zel hi ja.. ts.... .. ver..... ende of slaen vander huijre ende pacht voirsz. Ende alle dit lant voirsz. soe loevet Aelwijn voirseijt alle jaer dreesch op te leveren. In oirkonde

desen brieve beseghelt mit onsen zeghelen. Int jaer ons heren duijssent driehondert drie ende tachtich des dincxdaghes na Pinxter dach.

.....
Inventaris 502-836

Regest 1385 d.d. 03-03-1390.

Wi Dirc Poes Jans soen van Leijden ende Dirc Hoghestraet scepen in Leijden oirkonden dat voir ons quam men heer Gherijt Hoghestraet Pieters soen van Leijden ende Jacob Ghise ende ghelieden dat si vercoft hebben den deken ende den capitel van sinte Panraes kerc te Leijden derdalf morghen lands luttel min of meer die si legghende hadden mit ghemengheder voer inden ambocht van Zoeterwoude. Ende legghen mit ghemengheder voer mit vijf honden lands, die toe behoren eenre capelrie ghesacht in die ere gods ende des heijlichs cruys inder kerken toit Alkemaer. Ende beleggen heeft ant oestende Jan Costijns soen ende Wouter van der Bregghe, an die zuutside Dirc vander Werve ende Heijnric Rover, an die noirtside Kerstant Pieters IJden soen mit horen landen, streckende mitten westende ant Cattenland. Voirt loifden heer Gherijt ende Jacob voirsz. ende Mathijs Mathijs soen als een waerborghe mit ghemienre hant ende elc voir al voir hun ende voir haer nacominghe dese derdalf morghen lands voirsz. luttel min of meer te waren den deken ende den capitel voirsz. vri ende ombecommert toit ewighen daghen. Ende heer Gherijt ende Jacob voirsz. beloifden Mathijs Mathijs soen hier of scadeloes te houden. Ende heer Gherijt ende Jacob voirsz. belieden hun hier of voldaan ende wel betaelt vanden deken ende capitel voirsz., den eersten penninc mitten lesten. In oirkonden desen brief beseghelt mit onsen seghelen. Int jair ons heren dussent driehondert vijf ende tachtich op sinte Dijoniusus dach.

.....
Inventaris 502-837

Regest 1345 d.d. 17-08-1387.

Regest 1332 is niet aanwezig.

Wi Jan Baertout ende Andries Hughen soen scepenen in Leijden oirkonden dat voir ons quamen Jan Zoetinc Gherijts soen ende Heijlwide zijn trouwede wijf ende gelieden dat si vercoft hebben mid ghesamender hant ende elc voir al heer Pieter Gherijts soen priester alsulc lant, also groet ende also cleijn alst Claes Beckiaen het in zinen lesten hat. Welc lant voirnoemt ghelegghen is inden ambocht van Zoeterwoude ende van Ghelreswoude. Ende beleggen heeft an die oest zide Claes die Coster van Benthuijsen ende an die westzide Bonefaes Bonefaes soen ende Vranc Claes Hannen soens soen streckende van den Hoghen weghe up an die Noort A ende an Zoetermeere Vliet. Ende Jan Soetinc Gherijts soen ende Heijlwide zijn trouwede wijf voirghenoemt belieden hem hier of voldaan ende betaelt, den lesten penninc mitten eersten. In oirkonde desen brieve beseghelt mid onser zeghelen. Int jair ons heren duijssent drie hondert seven ende tachtich tsaterdaghes na Onser Vrouwen dach assumpcio.

.....
Inventaris 502-838

Regest 1355 d.d. 25-03-1388.

Dirc vanden Bosch Jans soen scout in Zoeterwoude doe cond allen luden dat voir mi quam ende voir die bure als voir **Clais Bon** ende Ghisebrecht Camperts soen inden ambacht voirsz. Pieter vanden Bosch Dircx soen ende gheliede dat hi vercoft heeft den deken ende den capitel van sinte Panraes kerc te Leijden twintich morgen lands ter goeder mate, legghende in een weer lands ende is ghehieten tPoelweer inden ambocht van Zoeterwoude voirsz. mitter huijsinghe ende mit al dat hout datter op dat voirland staet inden weer voirsz. Ende dit voirsz. weer inhout drie ende twintich morghen lands luttel min of meer dair die twee morghen of toe behoren Dirc van Stompwijk. Ende legghen anden oestende streckende vten Vliet after ander lant die totten huijse voirsz. hoirt ende een ander morghen lands an twestende ende toe behoirt den Heijlighen Gheest van Voirscoeten ende leijt besiden opten Vliet. Ende dit voirsz. weer heeft beleggen an die westzide Jan Barthout mit zinen lande ende an die oestzide die Hoflaen bider quakelbregghe, streckende vten Vliet an Stompwiker wech. Ende Pieter voirsz. loifde mit Pieter vanden Bosch Jans soen sinen neve ende elc voir al dese twintich morghen lands voirsz. mitter huijsinghe die opt weer voirsz. staet ende alsultanich hout alser nu ter tijt opstaet, den deken ende capitel voirsz. te waren iaer ende dach alze recht is, vrij ende commeloes als men een vri volboden erve sculdich is te waren allen commer ende renten dair of te doen diere tesar tijt op staen vijtghenomen jaerlixen tijnsen ende morghenghelt diere op bliven staen, gheliken buijrlanden. Voirt so loifden Pieter ende Pieter voirsz. dattet capitel voirsz. jairlix ontfanghen sel toit vijf iaren toe naistcomende alle jair elf pond ende vijftien scellinghen pajjments alken vanden huijse ende vanden maes lande ende zaetlande datter leijt twischen den Vliet ende der woninghe lane, behalven dat voirland mitten houte dat ghelegghen is twischen den zaetlande ende stompwiker wech voirsz., dair die huijzman buten den capitel voirsz. sijn hande niet anslaen en sel, noch onderw.... enich hout te

vellen of te snoeijen. Ende wair dat sake dattet capitel voirsz. vanden voirsz. voirwouden enich ghebrec vonde of namaels hadden, dat soude him Pieter ende Pieter voirsz. of hair nacomelinghers oprechten sonder wedersegghen. Ende Pieter van den Bosch Dircx soen loifde Pieter van den Bosch Jans soen sinen neve hier of scadeloes te houden. Ende Pieter vanden Bosch Dircx soen voirsz. bekende hun hier of voldaan ende betaillt vanden deken ende capitel, den lesten penninc mitten eersten. In oirkonde desen brief beseghelt mit minen seghel. Ghegheven int iair ons heren dusent driehondert achte ende tachtich op onser Vrouwen dach annunciacio.

.....
Inventaris 502-839

Regest 1422 d.d. 22-07-1394.

Ic Dirc van den Bosche scoutte in Zoeterwoude make condit ende kenlic alle luden dat ic daer an ende bi was als een rechter daer die canoniken van sinte Panraes kerke te Leijden an die ene side ende des heijlighen gheest meijsters van Voerscoten an die ander side over een droeghen alse van twisten die si onderlinghe hadden om achtendalf hont lants, ghelegghen te Stompwijk inden ambochte van Zoeterwoude in enen stucke lants dat haer Pieter Hoeschen weer hier, also dat die heren van sinte Panraes voirsz. souden dat voirsz. lant al behouden ende hoer oerbaer daer mede doen. Ende des heijlighen gheest meesters te Voerscoten iaerlix gheven voir dat voirseijde lant ende voer vijf scellinghe goets ghelts siaers die die Heijlighe Gheest te Voerscoten daer up te hebben plach een pont hollants comans pajiment, te betalen iaerlix tot Valkenburghe marct tot diere tijt toe, want enen ghemeijne vaert worde over meer. Ende so souden die heren van sinte Panraes voirsz. quite wesen van dien pachte voirsz. Want men dan die voirsz. achtendalf hont lants vercopen sel ende dat ghelt dat daer of coemt orbaren up die reijse. Ende voert ane so sellen die heren van sinte Panraes voirsz. des heijlighen gheest meesters die inder tijt wesen sullen te Voerscoten gheven alle iare ewelic durende vijf scellinghe hollants comans pajiment van horen lande dat si nu ter tijt daer hebben ende Pieter Hoeschen weer hiet te Stompwijk. Ende belegghen heeft an die oest side dat goetshuus van Voerscoten ende die Heijlighe Gheest ende Jan Heerman mit ghemengheder vore ende die westside Jan Heerman ende Boudijn Aernts soen ende dat noert ende streckende inden Vliet ende dat zuut ende in die wateringhe. Ende deser brieve sien twe al ghelijc van woerde te woerde. Ende elke partie heeffer een. Ende wair ic Dirc voirsz. scoutte in Zoeterwoude hier bi was daer dese voerwaerde gheschieden. Ende heb ic desen brief bezeghelt mit minen zeghel. Int jaer ons heren dusent driehondert vier ende tnegentich up sinte Marien Magdalenen dach.

.....
Inventaris 502-840

Regest 1433 d.d. 01-03-1395.

Wi Vranc IJsac ende Harman Jans soen scepenen in Leijden oirconden dat voer ons quam Dammes Jan Doerscijs soen ende gheliede dat hi vercoft heeft Heijnric van Lisse veertich scellinghe hollants comans pajiments siaers. Te betalen alle jaer binnen den vier heijlighen daghen van Kersavont ewelike durende dese renten voirsz. sel Heinric versien op vijf marghen lants die ghelegghen sien inden ambocht van Zoeterwoude. Ende heeft belegghen an die west side die abdisse van Reijnsburch ende an die ander side Dammes Jans soen voirsz. beide mit eijghen en mit erve streckende van Stompiker wech tot an die hoffstede. Ende waer dat zake dat dese vijf margen lants niet goet ghenoech en wairen dese voirsz. renten an te versien, so soude him Heinric voert versien an alle Dammes goede waer si ghelegghen waren. Voirt liede him Dammes hier of wel voldaan ende betaelt den lesten penninc mitten eersten. In oirkonde desen brieve bezeghelt mit onsen zeghelen. Int jaer ons heren duijssent drie hondert vive ende tnegentich upten eersten dach in Maert.

Regest 1768 d.d. 06-07-1436.

Wi Jan Reijner Gijsbrechts zoens ende (Lou) van der Goude scepenen in Leijden oirconden dat voir ons quamen Gheertruijt Jan van Reijnsburch weduwe van der (Heijde) ende Dierc Dircxz. ende gaven over mit gesamender hant capittel ende den goodshuus meesters van sinte Panraes kercke Leijdenten behoeff voirsz. enen scouten brieff dair dese brief doirsteken is mit recht ende mit vonnisse alse recht is. Ende scepenen wijsden den wijsden den deken, capittel en doedshuijs meesters voirsz. te winnen ende te verliesen in allen schijn offte Geertruijt Claes ende Evert voirsz. selve waren. In oirkonde desen brief bezegelt mit onsen zeglen. Int jaer ons heren duijssent vierhondert ses ende dertich upten sesten dach in julio.

.....
Inventaris 502-841

Regest 1556 d.d. 29-10-1410.

Bovenste gedeelte van dit regest is vergaan.

.... Pieter Ge..... in Leijden oirkonden (Pieter Butewech) priester die helft van vijf merghen lants dat Ghijsbrecht Claes ..istesz., Jan Jansz. gawe (Marijden) smijts?

dochter Jans wijf voirsz. Welc lant leit ghemengder vuer mitter weder die Jan Dircxz. heer Niclaes broeder voirsz. toebehoirt, ghelegghen inden ambocht van Zoeterwoude. Ende heeft belegghen an die westzide heren Philips Jansz. priester, an die noirt zide heren Jacop Jacopsz. priester, beide mit cappelrien lande, an die oest zide ende an die zuutzide die Vliet. Ende Jan Taeij ende Gherit van Oestgeest Willemsz. loveden mit ghesamender hant ende elc voir al heren Clais voirnoemt die helft van dese vijf marghen lants voirsz. te waren jair ende dach alsoe recht is ende als men een vrij volboden landt sculdich is te waren. Vri van allen commer ende van thiende. Ende Jan Taeij liede him hier of wel voldaan ende betaelt den lesten penninc mitten eerste. Voirt so lovede Jan Taeij, Gherijt van Oestgheest hier of scadeloos te houden. In oirkond desen brieve bezeghelt mit onsen zeglen. Int jair ons heren duijsent vierhondert ende tien upten neghen ende twintichsten dach in octobri.

Inventaris 502-842

Regest 1574 d.d. 03-07-1413.

Wi Willem ende Huijch Mairtinsz. scepenen in Leijden oirkonden dat voir ons quam Simon Ghisensz. deken (ende capittel van) sinte Panraes(een morgen land) bij Rodenburch laen ghemengeder vuer dat eghen loveden mit ghesamender hant elc voir al den deken ende capittel voirsz. die voirsz. merghen lants ende dach alst recht is als men een vrij eijghen erve sculdich is te waren. Ende Sijmon voirsz. lovede Ghijse Jansz. off houden. Voirt liede him voldaan ende betaelt den lesten penninc mitten eersten. oirkonden desen brieve bezeghelt mit onsen zeglen. Int jair ons heren duijsent vier hondert ende dertien up sinte Mairtijns avont translatio.

Inventaris 502-845

Regest 1653 d.d. 13-12-1423.

Dirc van den Busch ende Willem Heerman scepene in Leijden oirkonden dat voir ons quam joncfrou Machtelt van der Does mit hoire voechts hant ende gheliede dat si vercoft heeft den deken ende capittel van sinte Panraes te Leijden een marghen lants ende dertich gaerden ende een viertel van een gaerde ghelegghen inden ambocht van Zoeterwoude, ghemengheder vuer mitten deken ende capittel voirsz. Ende heeft belegen an een zide die vrouwe van Alcaede ende an die ander zide Jacop Marxz., streckende vter Vliet after ander (hen...) voirsz. Ende joncfrou Machtelt voirsz. ende Jan (Harmensz.) loveden mit ghesamender hant ende elc van al den deken ende capittel voirsz. lant te waren jair ende dach alsoe recht is als men vrij eijghen erve sculdich is te waren. Ende joncfrou Machtelt voirsz. lovede Jan voirsz. hier of scadeloos te houden. Voert so liede hair joncfrou Machtelt voirsz. hier of voldaan ende betaelt, den lesten penninc mitten eersten. In oirkonde desen brieve bezegelt mit onsen zeglen. Int jair ons heren duijsent vier hondert drie upten dertienden dach in decembri.

Inventaris 502-846

Regest 1699 d.d. 06-05-1429.

Ic Willem Heerman doe condt allen luden dat ic vercoft hebbe meester Jan van Leijden enen twijn van twe hont lants luttel min of meer ende is ghelegghen ander stede singel. Ende heeft belegghen an die een sijde Pieter Butewech Gherijts zoens erfnamen ende an die ander sijde Griete Langhen, streckende vander stede singhel graft after ander naest weijde. Ende ic Willem voirsz. ghelove meester Jan voirsz. dit voirsz. erve te waren jair ende dach als recht is ende alle commer of te doen die dair nu ter tijt op staet sonder vijftich scellinge hollants coments pajments tsiaers na in hout des scepen briefs die ic meester Jan voirsz. dair of over ghegeven hebbe ende belide mij hier of voldaan ende betaelt den lesten penninc mitten eersten. In oirkonde desen brief beseghelt mit minen zeghel. Int jair ons heren 1400 ende 29 op sinte Jans dach ante poortam latinam.

Inventaris 502-847

Regest 1855 d.d. 31-10-1446.

Regesten 1704 en 1739 niet aanwezig.
Wij Jacop van Zonnevelt ende Aernt van Rollant scepenen in Leijden oirkonden dat voir ons quam Lijsbet Clais Harmansz. dochter mit hoir gecorens voichts hant ende geliede dat sij vercoft heeft meester Jan van Leijden vijf ende twintich scellinge hollants comans pajments tsiairs mitten houde die Lijsbet voirsz. staende heeft up meester Jans voirsz. tuijn, gelegen inden ambocht van Soeterwoude, after ander stede singel. Ende heeft belegen an die een zijde Dirc Simonsz. ende an die ander zijde Jan Heijnricxz. die smit, streckende vter singel graft after totter halver sloot toe, die meester Jan van Naeldwijn half toe behoirt. Ende Lijsbet voirsz. ende Clais Harmansz. loveden mit gesamender hant ende elcx voir all meester Jan van Leijden dese voirsz. renten te waren jair ende dach als recht is

alsmen vrij renten mitten houde sculdich is te waren. Voirt lovede Lijsbet voirsz. Clais voirn. hier off schadelois te houden. Ende Lijsbet voirsz. beliede hoir hier off wel voldae ende betailt den lesten pennijnc mitter eersten. In oirkonde desen brieve bezegelt mit onsen segelen. Int jair ons heren duijsent vierhondert sesende veertich opten lesten dach in octobri.

Inventaris 502-848

Regest 1824 d.d. 29-05-1443.

Wij Wermbout Jansz. ende Jacop van Zonnevelt scepenen in Leijden oirkonden dat voir ons quamen Jan Willemsz., Jacop Willemsz. ende Jacop voirsz. lovet voir Adriaen Willemsz. sijnen broeder, Martijn Willemsz., Pieter Woutersz. als een voicht van Machtelt Willems dochter zijnen wive ende Fije, Aelwijn Dircxz. wedewij mit hoirs gecorens voichts hant ende gelieden dat zij vercoft hebben mit gesamender hant ende elcx voir all heer Jacop Pieters zoen priester sulke renten als hier nae gescreven volgen, staende op erven buijten der Coepoort inden ambocht van Zoeterwoude tusschen der stede singele an die een zijde ende den hantbogescuters Doelen an die ander zijde, streckende voir vander Hoflaen after an die Vliet ende Pieter Butewech Willemsz. lant. Eerst Harman kairdemaker heeft vijffentwintich roeden lants dair of ghift hij tsiairs twintch scellingen hollants comans pajment mitten houde. Item Coen Dircxz. heeft een ende twintich roeden dair off ghift hij tsiairs ses ende twintich groot, facit seventien scellingen ende vier penningen hollants comans pajment mitten houde. Item Gijsbrecht Dammesz. heeft een ende veertich roeden lants dair of ghift hij tsiairs vijftich groot, facit drie ende dertich scellingen ende vierdalven pennijnc hollants comans pajment mitten houde. Item Heijnric Paedze heeft sessende twintich roeden lants dair of ghift hij tsiairs sessende twintich groot, facit seventien scellinge ende vier pennijngen comans pajments mitten houde. Item Martijn van Prage heeft negen ende veertich roeden dair of ghift hij tsiairs twintich scellingen comans pajment mitten houde. Item Willem die coirnmeter heeft twee ende veertich roeden dair of ghift hij tsiairs twee ende veertich groot, facit acht ende twintich scellingen comans pajment mitten houde. Item noch heeft Willem voirsz. vier ende dertich roeden dair of ghift hij tsiairs vier ende dertich groot, facit twee ende twintich scellingen ende achte pennijngen comans pajment mitten houde. Item Dirc vander Overtocht heeft 29 roeden dair of ghift hij tsiairs negen ende twintich groot, facit negentien scellingen vier pennijngen comans pajment tsiairs mitten houde. Item noch heeft Dirc voirsz. seventien dalve roede, dair of ghift hij tsiairs viertien groot, facit negen scellingen vier penningen comans pajment mitten houde. Item Jacop Heijnensz. heeft twee ende dertich roeden, dair off ghift hij tsiairs twee ende dertich groot, facit een ende twintich scellingen ende vier pennijngen comans pajment mitten houde. Ende Jan Willemsz., Jacop Willemsz. ende Jacop voirsz. lovet voir Adriaen Willemsz. sinen broeder, Martijn Willemsz., Pieter Woutersz. als een voicht van Machtelt sijnen wive ende Fije, Aelwijn Dircxz. wedewij mit hoirs gecorens voichts hant, loveden mit gesamender hant ende elcx voir all heer Jacop Pietersz. voirsz. dese voirn. renten mitten houde vrij te waren jair ende dach alsoe recht is alsmen vrij renten mitten houde sculdich is te waren. Ende Jan Willemsz., Jacop Willemsz. ende Jacop voirsz. lovede voir Adriaen voirsz., Martijn Willemsz., Pieter Woutersz. ende Fije, Aelwijn Dircxz. wedewij alle voirsz. loveden malkander elc den anderen van sijn andeel hier off schadelois te houden. Voirt soe geliede hem Jan, Jacop ende Jacop voir Adriaen sijnen broeder, Martijn, Pieter ende Fije voirsz. hier off wel voldae ende betailt den lesten pennijnc mitten eersten. In oirkonde desen brieve bezegelt mit onsen zegelen. Int jair ons heren duijsent vierhondert drie ende veertich opten negen ende twintichsten dach in meije.

Regest 1891 d.d. 30-09-1450.

Wij Jan van Noorde ende Aernt Pouwelsz. scepenen in Leijden oirkonden dat voir ons quam inden gerechte heer Jacop Pieters soen priester mit sijns gecorens voichts hant ende gaff over meester Sijmon Mouwerijnsz. priester tot behoiff des dekens ende gemeen capittels van sinte Pancrais kerc tot Leijden enen scepenen brieff dair desen brieff doirsteken is, mit recht ende mit vonnesse alsoe recht is. Ende scepenen wijsden den deken ende capittel voirsz. dair mede te winnen ende te verliesen in allen schijn ijoft heer Jacop voirsz. selve wair. In oirkonden desen brieve bezegelt mit onsen zegelen. Int jair ons heren duijsent vierhondert ende vijftich opten lesten dach in septembrij.

Inventaris 502-849

Regest 1837 d.d. 21-06-1444.

Willem soen te Boxmeer ende Ghijsbrecht van Raephorst vrouwe van Boxmeer doen condt allen luiden dat wij mit gesamender hant onverscheijden ende elcx voir al vercoft hebben Jan Jan Eversz. vier morgen lants luttel mijn of meer bijden hoop sonder maet gelegen inden ambocht van Soeterwoude. Ende heeft belegen ant oesteijnde die heren van sinte Pancraes collegium tot Leijden ende die noort zijde Jan Jan Eversz. voirsz. Welc lant voirsz. wij geloift hebben ende geloven mit desen brieve voir ons ende voir onse erffnamen ende nacomelingen Jan Jan Eversz. ende sijnen

erffnamen ende nacomelingen dit voirsz. lant vrij te waren jair ende dach also recht is als men vrij eijgen erve ende lande sculdich is te waren. Ende waert dat Jan voirsz. hier enigen hinder of schade op quame dat sel Jan Jan Eversz. voirsz. verhalen an alle onse goeden, roerende ende onroerende, waer die gelegen zijn sonder enich weer mit enigen recht van ons of onse erffnamen ende nacomelingen dair tegen te doen. Ende hier off belien wij ons wel voldoen ende betaelt, den lesten pennijnc mitten eersten. In kennesse der waarheit soe hebben wij Willem soen tot Boxmeer ende Ghijsbrecht van Raephorst vrouwe van Boxmeer voirsz. desen brieve bezegelt mit onsen zegelen hier an gehangen. Gedaen int jair ons heren duijssent vierhondert ende vier ende veertich opten een ende twintichsten dach in junio.

Regest 1853 d.d. 02-08-1446.

Wij Ghijsbrecht van Zwieten ende Coen van Oesterwijc scepenen in Leijden oirkonden dat voir den gerechte quam Jan Jan Eversz. ende gaff over heren Dirc Aemsz. ende meester Bertelmees IJsbrantsz. priester als procuratoirsz vanden capittel van Hogelande tot des gemeen capittels behoiff een brief bezegelt mit Willem van Bocxmeer ende Ghijsbrecht van Raephorst vrouwe tot Boxmeer hore beijder zegelen, daer dese brief doirsteken is, mit recht ende mit vonnesse also recht is. Ende scepenen wijsden die procuratoirs voirsz. of diet namails wesen sullen tot des capittels behoif dair mede te winnen ende te verliesen, in alle schijn oft Jan voirsz. selve waer. Welcke lande Jan Jan Eversz. voirsz. na inhoud des principaels briefs gegeven ende bewijst heeft den capittel voirsz. voir sulc testament als heer Evert Jansz. sijnen broeder ant capittel voirsz. gemaict ende bestelt heeft. In oirkonden desen brieve bezegelt mit onsen zegelen. Int jair ons heren duijssent vierhondert ses ende veertich opten anderden dach in agosto.

Inventaris 502-850

Regest 1850 d.d. 21-05-1446.

Wij Dirc Coen Gerijtsz. ende Aernt Pouwelsz. scepenen in Leijden oirkonden dat voir ons quam Joest van Buijren mit joncfrou Machtelt vander Sevender sijnen wive ende gelieden dat sij vercoft hebben den deken ende gemeen capittel van sinte Panraes collegium tot Leijden die helfte van vier morgen ende twee hont lants ende is gehieten die Bolwerck camp, gelegen inden ambocht van Soeterwoude bijder stede van Leijden. Ende heeft belegen an die noortsijde die Heijlige Geest van Leijden ende an die westzijde noch den Heijlige Geest voirsz., an die noortsijde die oude Wermhout Claisz., an die oostzijde Pieter van Leijdens erffnamen. Ende Joest van Buijren mit joncfrou Machtelt vander Sevender sijnen wive ende Florijs van Alcmade Hugensz. loveden mit gesamender hant ende elcx voir all den deken ende capittel voirsz. die helfte vanden voirsz. vier morgen ende twee hont lands te waren, jaer ende dach doch also recht is ende als men vrije eijgen erve ende volboden lande sculdich is te waren. Voirt soe geloveden Joest van Buijren ende joncfrou Machtelt voirsz., Florijs van Alcmade voirsz. hier of scadelois te houden. Ende hier off soe beliede hem Joest van Buijren mit joncfrou Machtelt voirn. hier of wel voldoen ende betaelt den lesten pennijnc mitten eersten. In oirkonden desen brieve bezegelt mit onsen zegelen. Int jair ons heren duijssent vierhondert sessende veertich opter een ende twintichsten dach in meije.

Inventaris 502-851

Regest 1909 d.d. 03-11-1452.

Regest 1910 is niet aanwezig.

Wij Sijmon vanden Woude ende Jacop van Noorde scepenen in Leijden oirkonden dat voir ons quam Jan Taeij ende geliede dat hij vercoft heeft den deken ende gemeen capittel van sinte Panraes collegium tot Leijden dat rechte derdendeel van twalef morgen lands bijden hoop sonder maet soe groot ende clien als Jan Taeij voirsz. dat an bestorven is van meester Gerijt Lam sijn broeder, gelegen inden ambocht van Soeterwoude bij Zwietersluijse tusschen die Zwet ende die Vliet. Ende dit voirsz. lant is gelegen an drie perchelen des strecken die twee stucken vten Rijn over den dijck te Beldewaert in. Ende leggen alle drie stucken gemengeder vuer ende gemengeder airde mit heer Willem vander Boichorst cappelrie mit Dirc die Bruijn sijn broeder ende mit Veen Florijsz. Ende bruijct nu ter tijt Dirc Sijmonsz. Ende Jan Taeij ende Gerijt Lam loveden mit gesamender hant ende elcx voir all den deken ende capittel voirsz. dit voirsz. lant vrij te waren jair ende dach also recht is ende als men vrij lant ende eijgen erve sculdich is te waren. Voirt soe lovede Jan Taeij voirsz. Gerijt Lam voirn. hier of scadelois te houden. Ende hier of beliede hem Jan Taeij voirsz. wel voldoen ende betaelt, den lesten pennijnc mitten eersten. In oirkonden desen brieve besegelt mit onsen zegelen. Int jair ons heren duijssent vierhondert twee ende vijftich opten derden dach in novembri.

Inventaris 502-852
Regest 1934 d.d. 14-02-1456.

Wij Ghijsbrecht van Zwieten ende Dirc van Zijl Jansz. scepenen in Leijden oirkonden dat voir ons quam meester Phillips Codde doctor in medicine ende geliede dat hij den deken ende gemeen capittel van sinte Panraes collegiums tot Leijden gegeven ende bewijst heeft in testament voit Jacop Codde ende Ermgairt zijns wijs ziele meester Philips voirsz. vader ende moeder sestien scellingen pajments tsiaers. Te betalen alle jair tot Voirschoten ende Valkenburger marcten. Welcke renten meester Phillips voirsz. versekert ende bewijst heeft, te versien ende te verhalen op vier margen lants die meester Phillips voirsz. liggende heeft inden ambocht van Zoeterwoude gehieten Wildijken camp. Ende heeft belegen an dat noirtende die heren van sinte Panraes voirsz., an dat westende die heren van sinte Jans tUtrecht, an dat zuytende Mees Hugensz. ende an twestende Mertijn Pieter Jorijsz. stiefkint. Ende meester Philips voirsz. lovede den deken ende capittel voirn. dese voirsz. renten vrij te waren jair ended ach alsoe recht is ende als men vrij renten sculdich is te waren, mit voirwaarden dat die deken ende gemeen capittel voirsz. alle jair tot ewijgen dagen hier voir doen zullen Jacop Codde ende Ermgairt zijns wijs memorije ende Jan getide na costume ende gewoente vanden capittelle voirsz. na inhoud des capittels memoriboecx. In oirconde desen brieve bezegelt mit onzen zegelen. Int jair ons heren duijsent vierhondert ses ende vijftich opten viertiensten dach in februario.

Inventaris 0502-853
Regest 1997 d.d. 04-05-1465.

Wij Jacop van Noorde ende Pieter Florijs Asselijnsz. scepenen in Leijden oirkonden dat voir ons quam Vranck Meesz. ende geliede dat hij gehuijert heeft tiegen den deken ende capittel van sinte Panraes collegiums tot Leijden ende tiegen meester Pieter Gerijt Pieter Hazen zoensz. priester canoninck des selven collegiums als besitter van sinte Anthonis proven sestien morgen lands luttel mijn of mere die tvoirsz. collegiums ende meester Pieters voirsz. proven gemeen leggende hebben inden ambocht van Zoeterwoude welke huijer inghinck op sinte Pieters dach inden lanten int jair duijsent vierhondert vierentsestich lestleden ende sel geduijren vijftich jair lanck dair nae after een volgende den hoope tsiairs om vijff pont hollants comans pajments tsiairs. Te betalen alle jair tot Voirschoten ende Valkenburger marcten. Des zijn voirwairden dat Vranck Meesz. up zijnen coste maken sal wege watering ende banwerck dat den voirsz. lande toe behoirt. Ende sel geven enen comans groten vander morgen te morgen gelde alst te gelden is oick op sijnen coste. Ende wat ongelden den landen jairlicx meer comen te gelden, dat sel Vranck Meesz. voirsz. altijt wtleggen ende weder of slain vander naester huij ende die voirsz. lande houden buijten schaden ende doen al dat een goet oudt huijman sculdich is te doen. Welcke voirsz. sestien morgen lands belegen hebben an die zuytzijde Dirc van Zwieten ende der provenen lant van Leijden, an dat westeijnde die kerck van Zoeterwoude, an die noortsijde Clais Jan Eversz. ende Pieter Jacop Gerijtsz., streckende mitten oesteijnde over die Vliet tot an **Jacop Vranckensz.** ende **Dirck Vranckensz.** landen toe. Van welke huij tcapittel voirsz. toe behoirt die een helft ende sinte Anthonis proven die ander helft. In oirkonden desen brieve bezegelt mit onsen zegelen. Int jair ons heeren duijsent vierhondert vijf ende tsestich opten vierden dach in meije. **Broers?**

Inventaris 0502-854
Regest 2025 d.d. 20-12-1468.

Ick Dirc van Bosch scout inden ambocht van Zoeterwoude doe conde alle luden dat voir mij quam Pieter Willemsz. ende ghelieden vercoft te hebben Jacob Louwensz. twe pont tsiairs tot enen ewighen pacht. Te betalen vijftien stuiver voir een pont. Staende te voirsien op vier morghen lants, ghelegghen inden ambocht van Zoeterwoude. Welke voirsz. lant ende erff leghet in Pieter Willemsz. voirsz. huusweer. Ende hevet belegghen aen die noortside Aecht Gherijt (linen) hoel sloot ende aen die zuut side Pieter Willemsz. voirsz. ende Steffanie sijn moeder mit hoeren mede lants ghelegghen, streckende wt Zoeterwouwer weteringhe tot aenden Ommedijcs weteringhe. Ende dese voirsz. twe pont ghelovet Pieter Willemsz. voirsz. voir hem ende voir sine naecomelinghen iairlics alle iair, te betalen bijnnen den twaelf nachten van Kersavont ghelike dat men goede erflike renten sculdich is te betalen. Ende dit voirsz. erff ende lant ghelovet Pieter Willemsz. voirnoemt vrij te waren jair ende dach als recht is ghelike van buer lant. Ende wair dit voirsz. lant niet goet ghenoech dese voirseide renten aen te verhalen, soe soude Jacob Louwensz. voirsz. dese voirseide renten verhalen aen Pieter Willemsz. voirsz. ander goeden, roerlic ende onroerlic soe wair si ghelegghen waren. Ende van desen coop belijet hem Pieter Willemsz. voirnoemt al voldaan ende wel betaelt den laetsten pennijnc mitten eersten houde des briefs (maenre?) de ghelts. In kennijnsse der wairheit, soe heb ic Dirc van Bosch scout voirsz. desen brief bezeghelt mit minen zeghel hier onder aen ghehanghen. Int jair ons heren dusent vierhondert ende acht ende tsestich opten twintchsten dach in Decembri.

Inventaris 0502-855
Regest 2100 d.d. 22-08-1482.

Ic Huge Hugensz. van Zwieten scout inden ambocht van Zoeterwoude doe condt allen luijden dat op huijden datum sbriefs voir mij gecommen zijn inden ambocht voirsz. dair ic zat mit gespanneder vierschaer mit Pieter Oudgersz. den azinge Clais Valkensz., Clais Pietersz., Clais van der Molen, Clais snijder, Phillips Meesz., Gerijt Vechterensz. ende Gerijt Meesz. als zeven buijren, te weten Sander Willemsz. als gemachticht ende van wegen heer Thomas vten Camp priester ende Cornelis Jacopsz. vten Camp zijn broeders zoen eijscher ter eenre zijde ende Dibbout Harmensz. als gemachticht rentmeester vanden capittel ten Hogelande binnen Leijden verweerder an die ander zijde also zij tegen malkander dincplichtich geworden waren voir mij scout azinge ende zeven buijeren voirsz., roerende dat Sander Willemsz. als gemachticht gecommen is inden ambocht voirsz. ende heeft mit Ewout Jansz. mijnen bode een antastinge gedaen ende zijn hant geslegen an een half mergen lants gelegen inden ambocht voirsz. inden Breden camp bijder Waddinge in een camp van vierdalf morgen lants dair Sander voirsz. seijde toe gerecht te wesen, also dat selve half morgen lants geestelic goet was. Dat hij bewijsen woude met een fondacie brief die wel bezegelt was ende dattet selve halve morgen lants na inhoud den fondacie brief gegeven was tot behoef der vicarie diemen bedient in sinte Pieterskerk tot Leijden up sinte Jan Baptisten outair, dair Cornelis Jacopsz. voirseijt besitter of is. Dair op dat Dibbout Harmansz. voirsz. als gemachticht rentmeester naden recht vanden lande sonder hant weder of geslegen heeft, seggende dat dat selve halve morgen lants toe behoirde den capittel van Hogelande voorsz., zo den capittel voorsz. dat selve lant wittelic ende wel gecoft ende betailt heeft na inhoud des scepenen briefs die dair of is, so dat partijen om dair selve mit dincplichtige woirden an een buijerkenninge gegaen zijn als an mij scout azinge ende zeven buijeren voirsz., so dat ic als scout azinge ende zeven buijeren voirsz. alle partijen bescheijt deurgesien ende verstaen hebben. Des ic als schout voirsz. voir den azinge ende zeven buijeren voirsz. na eendrachteliken onse vonnisse gegeven hebben. Te weten Sander Willemsz. als gemachticht tot Cornelis Jacopsz. vten Campen behoef die kenning gewonnen ende Dibbout Harmansz. als gemachticht rentmeester vanden capittel verloren, also Sander voorsz. bewijsde mitter fondacie brief bezegelt mitten zegelen des bisscops van Utrecht zaliger gedachten der stede van Leijden ende heer Jan Rutgersz. fondator der voirsz. vicarie dat dit voirsz. half morgen lants geestelic goet is ende voortijs gegeven is tot behoef der vicarie diemen bedient in sinte Pieters kerc tot Leijden up sinte Jan Baptisten outair. Na welcken gewijsden vonnisse Dibbout Harmansz. voirsz. mij als scout an dongende dat ic sculdich waer hem hier of betoich ende brieve te geven up zijnen cost bezegelt mit mijnen zegele, om hem van des capittels wegen dair mede in recht te behelpen als van node wesen sal. Twelc die azinge ende zeven buijeren wesen voir recht dat ic sculdich was te doen. In kennisse der wairheijt so heb ic Huge Hugensz. scout inden ambocht voisz. desen brieve voir mij selven ende voirt ten bede vanden azinge ende zeven buijeren voirn. zo zij selve geen zegel en hebben, bezegelt mit mijnen zegele hier an gehangen. Upten twee ende twintichsten dach in augusto int jair ons heeren duijsent vierhondert twee ende tachtich.

Inventaris 0502-856
Regest 2124 d.d. 15-02-1488.
Regest 2191 niet aanwezig.

Wij Willem Heerman Florijsz. ende Heijnric van Alkemade scepenen in Leijden oerconden dat voer ons quam heer Claes Tol priester ende canonic van sinte pancreas collegium tot Leijden mit zijns gecorens voichts hant ende geliede dat hij vercoft heeft den deken ende gemeen capittel van sint Panraes collegium binnen Leijden ses morgen ende twee hont lants luttel min of meer, bij den hoep sonder maet gelegen inden ambocht van Zoeterwoude in een weer lants gehieten dat Schuijer weer. Ende hebben belegen an die suijtzijde Garbrant Claesz., an die noertzijde Vechoer Claesz. erfnamen ende Sijmon Claesz. erfnamen, an dat oestende die Vliet ende an dat westende Zoeterwouwer weteringe. Ende heer Claes voorsz. lovede den deken ende gemeen capittel voirnt. dese voorsz. ses morgen ende twee hont lants inder manieren voorsz. vrij te waren jaer ende dach als recht is ende als men vrij lant ende eijgen erve sculdich is te waren gelijcken buijerlant inden ambocht daert gelegen is. Ende van desen cope beliede hem heer Claes voorsz. wel voldae ende betaelt, den lesten pennijnnc mitten eersten. In oerkonden desen brieve bezegelt mit onsen zegelen. Int jaer ons heren duijsent vierhondert acht ende tachtich upten vijftienden dach in decembri.

Inventaris 502-857
Regest 2232 d.d. 02-06-1526.

Ick Ghijsbrecht van Zwieten ambochts heer ende schout inden ambocht van Zoeterwoude doe kondt ende kenlick allen luijden dat voer mijn quam Mathijs Jansz. ende ghelijede voer hem ende voer zijnen

erven schuldich te wesen Jan Gherijtsz. ende Willem Gherijtsz. te samen of een van beijden een voer al die summa van vijer pont hollants tsaers ewijghe ende erflijke losrenten dertich comants groten gherekendt voer een pont vrijs ghelts van allen onghelden. Ende die te betalen alle jaeren op Onser Vrouwen daech te Lichtmisse, daer dat eerste jaer renten ende dach van betalen wesen ende verschijnen sal int jaer ons heren duijsent vijf hondert ende seven ende twijntich op Onser Vrouwen dach te Lichtmisse ende soe voert van jaer tot jaer dese voersz. renten te betalen duijrende soe langhe als die ghelost worden ende dan nijet langher. Ende dese voersz. renten sullen Jan Gherijtsz. ende Willem Gherijtsz. of eenijch van hem beijden of horen erven alle jaere opten voersz. dach moghen verziyen ende verhalen ende staen op drie marghen lants dat Mathijs Jansz. ghecoft heeft van Jan Jansz. warmoes man. Ende heeft beleggen inden voersz. amboecht an die noertzijde Olof Dircksz. ende (...) (Heinricks) soen ende an die zuijtzijde ende dat west eijnde Mathijs Jansz. ende an dat oesteynde den Broeck wech. Ende te moghen verhalen an alle dat gheen opt voersz. lant bevonden soude moghen worden of an die ghenen die dit voersz. lant nuter tijt ghebruijcken of diet hijer naemaels sal moghen vercrijghen, waer ende waer an die gheleggen zijn of waer men die sal moghen bevijnden, tsij in steden, dorpen of daer buijten. Ende Mathijs Jansz. ghelovede voer hem ende voer zijn naecomelinghen hijer gheen weer van recht teghens te doen noch doen doen in eenijgher manijeren tsij gheestelijck noch waerlijck noch mijt ghenen nuwen vonden diemen hijer op contrarije teghens soude moghen dencken of verziyeren om inder betalijnghen souden moghen letten of deren. Ende zijn voer waerden dat Mathijs Jansz. voersz. of zijn naecomelijnghen dese voersz. renten teijnden twije jaren sullen moghen lossen ende of doen tot datum van desen brijef ende nijet eer mer dan tot welcker tijt dattet hem belijven sal te vrijen sonder wedersegghen van ijemant elcken pennijck uijt seshijen, mijt die verschenen renten ombetaelt nae den beloop des tijts als die lossinghe gheschijen sal. Alle dunck sonder arch of lijst. In een kennijssen der waerheit soe hebbe ick Ghijsbrecht van Zwijeten amboechts heer ende schout inden voersz. amboecht desen brijef bezeeghelst mijt mijn selfs zeeghel hijer onder an ghehanghen. Daer bij an ende over waren als tuijghen Dirck Dircksz. ende Jacob Quijrsz. Int jaer des heeren duijsent vijf hondert ende ses ende twijntich den anderden dach in junio.

Regest 2379 d.d. 05-12-1545.

Wij Florijs van Oij ende Quijrijn Allertsz. schepenen in Leijden oirconden dat voordien gerechte quam Claes Cornelisz. int Laghe lant als man ende voicht van Marijtghe Willems dochter zijn huijsvrouwe erfgename van Willem Gerijtsz. haer vaeder was zaligher gedachten. Ende gaf over Cornelis Adriaens soen wantsnijder eenen scepenen brief daer desen brief doersteken is, mit recht ende mit vonnisse als recht is. Ende scepenen wijsden Cornelis Adriaensz. voersz. daer mede te winnen ende te verliesen in allen schijn oft Claes Cornelisz. voorn. inde name als boven zelve waer. In oirconden desen brief beseghelst mit onsen zegelen. Int jaer ons heeren duijsent vijfhondert vijf ende veertich upten vijftien dach in decembri.

Regest 2399 d.d. 10-02-1551.

Copie.

Wij Jacob Jacobsz. schout inde ambachte van Valckenburch ende beide Catwijcken, Jacob Andriesz. ende Gerrit Ghijsz. gesworens der gerechte inden ambachten voersz. doen condt allen luijden dat voor ons gecomen ende gecompareert is selver in persoon Arent Willemsz. oock onse mede buijrman tot Valckenburch ende gelijde mitsdesen voor hem ende sijnen erven vercoft te hebben ende schuldich te wesen Frans Fransz. oock ons buijrman tot Valckenburch, zijnen erven ende bij zijnen wille den houder van desen een jaerlicxe erflijcke losrente van drie karolus guldens van veertich groten vlaems tstick tsaers Verschijnende de zelfde rente alle jaers Vrou Lichtmissen, waer van teerste jaer rente verschijnen sal Vroulichtmisse anno 1500 twee ende vijftich nae tgemeen schrijven ende soo voorts van jare tot jare geduijrende. Zoo lange de voersz. rente al off gelost gevrijt ende gequeten sal zijn. Twelck Arent Willemsz. zijne erven ende nacomelingen altijts sullen mogen doen tot haren belieften, mits eens ende teffens op te leggen ende te betalen acht ende veertich der voersz. karolus guldens in hoofdelde, mits eens ende teffens op te leggen ende te betalen die verlopen renten nae beloop des tijts verschenen als die lossinghe geschiet. Welcke rente ende thoftgelt vandien Arent Willemsz. comparant voersz. verseeckert ende gehijptequeert heeft specialijck op huijs ende erff ende boomgaert, staende tot Valckenburch. Ende heeft belendt ende belegen an dat westende den Rijndijck, aen die noortsijde die Veersloot, an oosteynde den Rijn, an die zuijtzij Louweris Jacobsz. Ende voort generalick ende specialick allen anderen hem comparant voersz. goeden, roerende ende onroerende, waer ende waer an die gelegen zijn in steden, dorpen ende daer buijten die hij comparant voersz. nu ter tijt heeft ende hie naemaels vercrijgen mach, nergens eenige vandien tot eeniger plaetsen uijtbesondert, tot verbant van allen sheeren rechten ofte tot alsulck verbandt van recht als Frans Fransz. ende den houder dees dat eerst ende best belieft, mits schaders oock allen costen, interest, hinder ende schade hier omme gedaen ende geleden. Renunchiërende

ende te buijten gaende alle verweer van recht ende andere exceptien ende nieuwen vonden dees ter contrarie. Ende van dese coope zoo gelijde hem Arent Willemsz. comparant voorsz. alle ten vollen eerlijcken ende deuchdelijcken verneucht, voldaan ende betaelt te wesen den lesten penning mitten eersten. Alle dunck sonder arch ende list. Dees toerconden zoo hebbe ick Jacob Jacobsz. schout voorsz. door beden van Arent Willemsz. comparant voorsz. mijn eijgen zegel uijthangende hier an gehangen ende dat oock ter beden ende in presentie vanden geswoorens voorsz. die selfs geen segelen ghebruijcken. Actum den thienden dach februarij anno 1500 een ende vijftich nae tgemeen schrijven. Onder de plaijque stont geteijckent (merk) Schenebis, was besegelt met een groen wasschen segel aen een dubbele franchijnen staert uijt hangende.

Ter secretarie der stadt Leijden gecopieert uijt sijne principale, ondergeteijckent ende besegelt als boven. Ende is desen naer gedaen collatie daer mede bevonden t'accorderen. Actum den lesten novembris anno 1600 negen ende twintich.

Mij kennelijck: Baersdorp 1629.

Ick ondergescreven als rentmeester vande goederen des capittels ten Hogelande binnen Leijden, bekenne bij desen den principalen van desen gelicht ende ontfangen te hebben wt handen vande secretaris deser stede, bevonden daer van te verantwoorden naer behooren. Ten oorconden deser ondergeteijckent. Actum den 1^e Decembris anno 1600 negen ende twintich.

J. van Groenedijck.

Regest 2408 d.d. 26-05-1554.

Wij Dirck Jansz., Cornelis Adriaensz. stienplaetser ende Huijch Gerijtsz. Vroeman wonende inden ambacht van Valckenburch geloven mits desen Cornelis Adriaensz. wantsnijder poorter van Leijden dat in gevalle alsulcken schouten bezegelden brieff van drie karolus guldens tsiaers losrenten die hij van eenen Frans Fransz. tot Valckenburch ontfangen heeft, sprekende up eenen Aernt Willemsz. mede buijerman tot Valckenburch mit alsulcke ijpotecque alsden zelve brief vermeldt, tot enige tijden nijet guet genouch en waer voor die hoofdsomme ende jaerlicxe rente, dat wij als dan de voorsz. renten betaelen zullen, ofte hem vorder vasticheit daer off verlenen ende verlijden. Hier onder stellende ons personen ende alle onse gueden dien wij nu ter tijt hebben ende hier naemaels vercrijgen sullen mogen tot coharte ende bedwanck van allen tsheeren rechteren. Renunchiërende ende te buijten gaende alle termijnen van rechten ter contrarie van desen. In kennisse der waerheijt hebben wij Dirck Jansz., Cornelis Adriaensz. ende Huijch Gerijtsz. voorsz. elcx onse gewonelijcke hanteijcken hier onder gestelt int bij wesen van Pieter Jansz. ende Cornelis Cornelisz. Elsthuijn die dit als getuijgen mede onder geteijckent hebben. Upten zes ende twintichsten dach in meije anno vijftienhondert vier ende vijftich.

Regest 2437 d.d. 26-01-1568.

Wij Huijch Claesz. Gael ende Dirck Gerijtsz. Smalingh schepenen in Leijden oirconden dat voor ons gecompareert is Marijtghe Frans dochter wedue van Cornelis Adriaensz. van Werchoven mit Gerijt de Vrij haer zoon ende gecoren voocht in desen zaecke ende bekende getransporteert te hebben ende transporteert mitsdesen ten behouwe ende proffijte vanden deecken ende gemeen capitularen van sinte Panraes collegie deser stede, de twee rentebriefven daer desen onsen briefve op doersteecken is, spreekende deene houdende vier ponden hollandts erflickken losrenten, verschijnende jaerlicx tot Lichtmissen daghe op Mathijs Jansz. ende dander houdende drie guldens van veertich grooten vlaems tstück tsiaers, verschijnende als boven op Aernt Willemsz. tot Valckenburch, mit alle brieffs recht ende actie haer comparante daer aen ende tot de renten ende hoofdsomme ende andere beloften daerinne begrepen oft toebehorende competerende, omme daer mede te mogen winnen ende verliesen in allen schijn oft zij comparante voorn. zelfs waer. Ende beloofde mitsdien den deecken ende capitularen voorn. de voorsz. twee rentebriefven te waren als recht is. Onder verbandt van alle haer comparantes goederen, roerende ende onroerende, jegenwoordich ende toecomende, actien ende crediten, geen vuytgesondert. Bekennende hier ter cause vanden voorsz. transporte wel ende volcomelicken vernoucht, voldaan ende betaelt te wesen, den lesten penning mitten eersten. In oorconden desen briefve bezegelt mit onsen zegelen. Opten zessentwintichsten januarij anno 1500 acht ende tsestich stijlo curie.

Inventaris 0502-858

Regest 2234 d.d. 19-07-1507.

Wij Cornelis Mast ende Willem Jan Kerstantsz. scepenen in Leijden oirkonden dat voir ons quam Jan Stoop Kerstants zoon ende geliede dat hij vercoft heeft die deken ende gemeen capittel van sinte Panraes collegium binnen Leijden die helfte van vijf morgen lants gelegen inden ambocht van Zoeterwoude in Zwieter broeck. Ende heeft belegen an die oestzijde Willem Foeijtgensz. ernamen mit dat capelrie lant ende an die westzijde tcapittel van sinte Panraes ende Jan vander Boechorst mit dat capelrie lant, streckende voir vande Swiet tot after inde Zwet. Ende Jan Stoep voorsz. lovede die

deken ende gemeen capittel voorsz. die voorsz. helft van vijf morgen lants vrij te waren jaer ende dach als recht is ende als men vrij buijrlant schuldich is te waren inden ambocht dairt gelegen is. Voirt zoe beliede hem Jan Stoop voorn. van desen coepe wel voldaan ende betaelt, den lesten penning mitten eersten. In oirkonden desen brief besegelt mit onsen zegelen. Int jaer ons heren duijsent vijfhondert ende seven opten negentienden dach in Julio.

.....
Inventaris 0502-859

Regest 2275 d.d. 07-08-1516.

..... Cornelisz.rst ende Jansz. van (Beuningen) scepenen in Leijden oirkonden dat voir ons quam (Ja)cop Heerman ende bewijsde den deken ende gemeen capittel van sinte Panraes collegium binnen Leijden sestien scelling goets gelts tsiairs mitte houde, staende op Martijn Claesz. thuijn mit buijten die Hogewoirts poort inden ambocht van Soeterwoude ende betalinge van pondt pajments tsiairs mitten houde dat Jan Heerman des voorsz. Jacop Heermans zoon als canoninck van sinte Panraes collegium voorsz. den selven capittel schuldich was nae inhoudt der statuten des capittels voor welcke voorsz. thuijn mit erve belegen heeft an die westzijde Cornelis Jansz., an de oestzijde van Tetroede, streckende vande stede singel after ande weije ende Jacop (Heer)man ende schout quijt ende gemeen capittel voirn. alle recht eigendom actie hij ande voorsz. sestien scelling goets gelts tsiairs mitten houde te seggen heeft ofte tot desen dage toe datum des briefs ende gelovede den deken ende gemeen capittel nijmmermeer antal..... ansprake noch moeijnisse te doen noch te doen doen in gene manieren noch mit gene rechten geestelick noch wairlick. In oirkonden desen brief besegelt mit onsen segelen. Int jair ons heeren duijsent vijfhondert ende zestien upten sevenden dach in augustij.

Was getrekend: (?). Florijs.

.....
Inventaris 0502-860

Regest 2276 d.d. 19-05-1517.

Wij Volpert Roelofsz. ende Willem van Lodesteijn schepenen in Leijden oirkonden dat voor ons quam Jacop Heerman ende geliede dat hij vercoft heeft den deken ende gemeen capittel van sinte Panraes collegium binnen Leijden tot des voorsz. gemeen capittels behoeff alsulcke twee ende twintich scellingen goets gelts tsiairs mitten houde als hij jairlicx spreckende heeft up meester Willem Sijmonsz. van Oij doctor inden rechten thuijn mit erve, gelegen buijten die Hogewoirts poort ande stede singel inden ambocht van Soeterwoude. Ende heeft belegen an die oestzijde derfnamen van Luijt die schoemaker, meester Reijer berbier, Reijntgen Pieter Francken weduwe ende heer Mathijs priester elcx mit hoer thuijnen ende an die westzijde meester Heijnrick berbier, streckende voir vande stede singel after an die weijen. Ende verschijnen jairlicx tot Voirschoten ende Valckenburger marcten. Ende Jacop Heerman voorsz. lovede den deken ende gemeen capittel van sinte Panraes collegium voorsz. dese voirseijde renten vrij te waren jair ende dach als recht is ende als men vrije renten up thuijnen mit horen erve schuldich is te waren. Voirt zoe geliede hem Jacop Heerman voorsz. van dese coepe wel voldaan ende betaelt, den lesten penning mitten eersten. In oirkonden desen brief besegelt mit onsen segelen. Int jair ons heren duijsent vijfhondert ende zeventien upten negentienden dach in meije.

Was getekend: Florijs.

.....
Inventaris 0502-892

Regest 756 d.d. 03-05-1337.

Ic Dieric Buffel scout in Zoeterwoude make cont allen luden dait voer mi quam ende voer (s.men) buren van Zoeterwoude Claijs van Bakenesse ende beliede hem dat hi vercoft heeft ..dechien Heijnrix zoen een pont hollantsche, vries ghelts jaers. Te betalene dene helfte toet Voerscotenre market ende dander helfte tot Valkenburgher market, alle jaer. Ende beliede hem daer of betaelt, den lesten penninc mitten eersten. Ende dit voorseijde pont ghelts jaers sel (Jachum?) voorscreven versien op vijftalf marghen lant die Claijs voerghenoemt legghende heeft int ambacht van Zoeterwoude mitten burchgrave van Leijden ghemene. Ende belegghen heeft an die oestzide Aelbrecht Florens zoen ende an die westzide Gheret (Fined) mit erf hure van den goedshuse van Egmonde, vutgaende inden In oirkonde desen brief bezeghelt mit minen zeghele. Ghegheven int jaer ons heren dusent drie hondert seven ende dertich saterdaghes na meije dach.

.....
Inventaris 0502-893

Regest 1041 d.d. 21-03-1371.

Wouter Heijnrix soen doe cond allen luden dat Ghertruud mijn wijf ende (it) Sijmon Pieters soen ende mester sine wive bewijst hebben voer hoers vader erfnes alsoe als si ende haer susteren Baertraed

ende Lisebet ghesceijden sien met haren goede bi horen vier veirendel die daer bi ende aen waren als haer Hughe van Stoerlehenrit van Lisse sijn broeder, Sijman Ghisebrechts soen, Heijnric Gherrits soen, Bartout Lot Heijne Ebbis ende Willaem Sanckis alle die hofsteden ende renten die minen wive voersz. aen ghecomen sien binnen der stede van Leijden overmids Staes Heijnrix soens doet dien god ghenadich si een sevendeel vanden huse ghelegghen upte grafte after Jan Heijnrix soens huse was ende vander, alsoe groet ende alsoe cleijne als daer toe behoert ende des ghelijcs een sevendeel van allen den lande dat Staes Heijnrix soen voersz. mitter doet het ende ghelegghen is binnen den ambocht van Zoeterwoude bi Boschusen in Katrine Ghisen weer alsoe verre als si stricken moghen, want si alle drie (.mese) Baertraed ende Lisebet voersz. effen ruc wesen sellen van haers vader erfnes. Ende ic Sijman Pietersz. voersz. doe cond allen luden dat ic vercoft hebbe heren Hughen Heijnrix soen prochpape van Scoerle voerghenoemt alle dit voerspreken goed lant rente ende husinghe alsoe groet ende alsoe cleijne alst Wouter Heijnrix soen ende sijn wijf mijn swegher voersz. mine wive ende mijn bi hoire vier verr..... bewijst hebben ende mijnre sweger aen ghecomen was van Staes Heijnrix soens hoers broeders doet ende ghelic daer of betaelt, den lesten penninc mitten eersten ende ghelove hem dat te ware iaer ende dach als men vri goed ende erve scondich is te waren. In oirconde hebbe wi Wouter ende Sijman beijde voerscr. desen brief beseghelt mit onsen seghelen. Ghegheven int jaer ons heren duser dree hondert ende enenseventich des (...)ghedaghes na sinte Ghertruden dach.

.....

Inventaris 0502-907

Regest 1216 d.d. 03-02-1379.

Alle den ghenen die desen brief sellen sien of horen lesen doe ic kond Hughe vanden Ooi de scout van den ambocht van Zoeterwoude dat voor mi buurlude des ambochts van Zoeterwoude voerscreve ende (liede) .. be...enen staen quam Walich Jans zoen ende ...liede dat hi vercoft heeft enen eersamighen man Phillips van Leijden achte morghen lants twee hont ende twintichs gaerden legghende inden ambocht van Zoeterwoude voersz. Van wilken lande seventalf morghen ende twintich gairden ghelegghen in een weer ghehieten Aelwijn Claes zoens weer daer nu ter tijt Aelwijn voerscr. woenachtich op is mit sinen landen ghemengder voer. Ende belegghen heeft Poes Vranken soen en Aelwijn Claes soen voirnoemt mitten swerweer andie noortside ende Aelwijn Claes zoen voirsr. andie zuutside. Ende die vier morghen ende twintich garden vanden zevendalf morghen voirsr. die ghelegghen sien aen die noortside streckende vanden Rijndijc, den Rijndijc daer in ghemeten mit half den dijcsloot te Rijn waerts (ver.orven), an een lant gheheten Andries camp. Ende van desen zevendalf morghen voerscreven so stricken dardalf marghen die ghelegghen sien andie zuutside vten Rijn andie Burmade. Voort van desen lande voirsr. sien ghelegghen elf hont in enen camp van twee ende dertich hondent mit Vrake Ijsaac ende coman Aer..s lande in ghemengde voer, streckende vten Rijn te veldewaerts (..). Ende van desen achte marghen lands ende twee hont ende twintich garden voirsr. soe beliet hem Walich Janszoen voirsr. wel betaelt, den lesten penninc mitten eersten. Ende heeft meester Phillips van Leijden voirsr. daer of ghegheven enen vrijen eijghendom ende heeftet hem gheloeft te waren als men een vri volboden erve sculdich is te doen. Ende hier over so hebben gheweest buurlude des ambochts van Zoeterwoude alsoe Mouwerijn van der Does Hughen.... Jacob ...wen Veen, Florijs Gherijts zoen ende Pieter Gherijt..... In des briefs (mit minen) zeghel. Ghegheven int jaer ons heren duser dree hondert (neghen) ende tseventich des vridaghes na Onser Vrouwen dach Purifieacto.

.....

Inventaris 0502-908

Regest 1224 d.d. 06-07-1379.

Alle den ghenen die desen brief sellen sien of horen lesen doe ic versalen Dirc van den Bosche scout inden ambocht van Zoeterwoude dat voer mi quam Willaem Jacobs soen ende liede dat hi vercocht heeft enen eersamen manne meester Philips van Leijden die helft van neghendalf hont lants ses ende dertich garden ende neghen voet, legghende mit Pieter Phillips Jan Omen soens soen in ghemengder voer inden ambocht van Zoeterwoude. Dat hi mit Liddelde Phillips Jan Oemen soens dochter sine wive nam. Wilc lant voirsz. meester Phillips voirsz. selve belegghen heeft an die ene side mit enen camp lants gheheten Alrebroos camp. Van desen lande voirsz. liet Willaem Jacobs soen voirsz. betaelt den lesten penninc mitten eersten. Ende heeft meester Phillips voirsz. daer of ghegheven enen vrien eijghendom. Ende heeftet hem ghelooft te waren als men een vri volboden erve sculdich is te doen. Hier over hebben gheweest buerlude vanden ambocht van Zoeterwoude voirsz. alsoe Gheert Hoven soen, Dammaes Jan Doerschinson ende Overaert Claes Anen soen soens soen. In orcunde desen brief beseghelt mit minen seghel. Ghegheven int jaer ons heren duser dree hondert neghen ende tseventich des donredaghes na sinte Pieter ende Powels dach.

.....

Inventaris 0502-909
Regest 1238 d.d. 17-06-1380.

ic Diederic van den Bosche scout inden ambocht van Zoeterwoude doe cont allen luden dat voer mi quam Rutghaer Heijlen soen ende beliede dat hi vercocht heeft enen eersamighen man meester Philips van Leijden een morghen lants ghehieten Oudemade, die houden vier dalve marghen lants ende dertich ghaerden, daer derdalver marghen lants of toe behoren heren Jan Rutghaerts soens cappelrie, mit ghemengheder voer, streckende an sinte Pieters hoeve ende meester Philips voersz. selve belegghen heeft an die een side. Van wilken lande voersz. Rutghaer voersz. him beliede betaelt den lesten penninc met den yersten. Ende heeft meester Philips voersz. daer of ghegheven een vrien eijghendom ende heeftet hem beloeft te waren als men een vri volboden erve sculdich is te doen. Hier hebben over gheweest buerlude van den ambocht van Zoeterwoude voersz. als Hughe Woutersz. ende Jan Gheert soen. In orconde desen brief beseghelt met minen seghel. Ghegheven int jaer ons heren dusent driehondert ende tachtich des saterdaghes na Odulphi.

.....

Inventaris 0502-930
Regest 791 d.d. 22-08-1349.

Allen den ghenen die desen brief sullen sien of horen lesen make ic kont ende kenlic Dirc van den Bosche in Zoeterwoude dat voer mi ende voer die ghemene buere quam Barteraet Gherets mit Dirc Gherents soen haren soen, haren coren voecht ende beliede dat si vercoft heeft haren Pieter den Hoeschen priester tien scellinghe hollants tsiaers, welke staende alsulc ghelt als die here doet creijeren in sinen marcten op vijf morghen lands die ghelegghen sien in den ambacht van Zoeterwoude. Welc lands belegghen heeft an die oest side Dirc Gherets soen voerscreven mit sinen broederen ende susteren mit eijghen ende Jacob die brouwer an die west side mit eijghen ende dat noert ende wtstreckende inden Vliet ende dat suud ende indie wateringh. Welc lant voersz. vri is van allen onghelde, wt ghenomen vijf scellinghe tsiaers die er heeft die Heijlighe Gheest te Voerscoten. Ende dese voersz. renten selmen jaerlix betalen te Valkenburgher marct binnen der betalinghe. Ende waer dat zake dat dese voersz. renten niet betaelt en voordien alst voersz. is. So soude haer Pieter voersz. of yement van sijn nacominghe an tasten twee morghen lants van desen voersz. lande over sijn vri eijghen voer dese voersz. renten. Ende waer dat zake dat haer Pieter of sijn nacominghe dese voersz. renten vercopen woude, so mochte Barteraet voersz. of haer erfnamen losenen dese voersz. renten om dien penninc die si waerdich sijn voer een ander. In kennesse der waerheijde so heb ic desen brief bezeghelt mit minen zeghele. Ghegheven int jaer ons heren dusent driehondert neghen ende viertich des dinxdaghes na Onser Vrouwen daghe te midden oest.

.....

Inventaris 0502-931
Regest 962 d.d. 31-10-1368.
Regest 801 niet aanwezig?

Allen den ghene die dezen brief zullen zien of horen lezen make ic cond Dirc van den Bosche scout van Zoeterwoude dat ic daer over ende aen stont als een scout daer haer Jan Willaems soen priester ghaf mit zinen ghecoren voghet mit hande ende monde voer mi voer den asinghe ende voer die buren alze Gheret grote Gherets soen, Pieter Pieters soen, Zever(ijn) Jans soen, Pieter Claes Hobben soens soen ende Aernt Pieters soen, enen ghift mit enen vrien eijghendom haren Pieter die Hoeschen, alze van der canezie wegghen toet zynre proven behoef die hi ghemaect hevet in der kerke ende canezie opt Hogheland inden eersten een campe lands die ghelegghen is in den ambocht van Zoeterwoude, houdende drie morghen luttel meer of min. Ende belegghen hebben Hughe Badzeleders kinderen, an die noertzide ende die cappelrie camp an die zuijtzide. Item in den zelven ambocht een campe lands op Meerburgher weterinc die gheheten is Poeskiaens camp, houdende vier morghen luttel meer of min, streckende van Pieter Wouters soens kinderen land op den weterinc voersz. In kennesse dezer waerheijt, so heb ic dezen brief bezeghelt mit minen seghel. Ghegheven int jaer ons heren dusent driehondert achte ende tsestich op alre goets Heijlighen avond.

.....

Inventaris 0502-932
Regest 885 d.d. 04-03-1363.

Wi Gheret van Oistgheest Rutgherts soen ende Danel Jans soen scepenen in Leijden doen cond allen luden dat voir ons quam Lisebet Laghelanders dochter mid Ghisebrecht Pieters soen ende Dirc Pieters soen hoir broeders ende ghelieden dat si vercoft hebben heer Pieter den Hoeschen priester twee morghen vrijs lants in een weer daer hem Pieter voersz. te voeren in hadde drie morghen lants die ghelegghen sijn in den ambocht van Zoeterwoude, streckende van Voerscoeter vliet an Stompicker wech. Wilke twee morghen lants Lisebet voersz. mid Gisebrecht ende mid Dirc hair broeders gheloven

heer Pieter voirsz. te waren dese twee morghen lants voirnoemt als men een vrij erve sculdich is te waren. Ende belien hun daer of betaelt, den lesten penning mitten eersten. In oirkonde desen brieve beseghelt mid onsen seghelen. Ghegheven int jaer ons heren 1300 drie ende tsestich upten eersten saterdach in maerte.

.....
Inventaris 0502-962

Regest 1315 d.d. 26-07-1385.

Wi Dirc Poes Jans soen van Leijden ende Dirc Hoghestraet scepen in Leijden oirkonden dat voir ons quam Dirc Poes Jan Pieters soens soen ende ghelijede dat hi vercoft heeft heren Jacob Claes soen een hont lants die behoren sel tot sinter Nijclaes proven die nu ter tijt heren Jacobs is voiscr. Wilc hont lants ghelegghen is over die hoeve in een camptgen ende hout achte hont luttel mijn of meer dair die een helft toe behoirt sinter Nijclaes (proven) voiscr. ende die ander heeft meester Philips er(f)namen. Wilc lant ghelegghen is inden ambochte van Zoeterwoude. Ende Dirc Poes Jans soen voiscr. belijet him betaelt den lesten penninc mitten eersten. In oirkonde desen brieve beseghelt mit onsen seghelen. Int jair ons heren dusent drie hondert vijf ende tachtich des woensdaghes na sinte Jacobs dach.

.....
Inventaris 0502-971

Regest 2037 d.d. 27-09-1471.

Wij Dirc van Zijl Jansz. ende Ewout Pietersz. scepenen in Leijden oirkonden dat voir ons quam Andries Mees Hovensz.z. ende geliede dat hij vercoft heeft heer Pieter Dirc Hillemsz.z. priester enen gouden engelsche nobel of vijftich placken voir datum sbriefs geslegen gerekent voordien gouden engelsche nobel tsaers ewige ende erflike renten. Te betalen alle jair tot Voirschoten ende Valkenburger marcten. Te versien ende staende op achte morgen lants die Andries voirsz. leggende heeft inden ambocht van Zoeterwoude in een weer van seventien morgen lants gehieten Vasters werv, dair die ander negen morgen lants of toebehoren heer Pieter voirsz. Welc weer van seventien morgen lants voirsz. belegen heeft an die westzijde Pieter Claisz, Gerijt Meesz. ende Jan Jansz. an die oestsijde die Heijlige Geest tot Leijden, meester Sijmon Mouwerijnsz., Aelbrecht Jansz. ende Huce Claisz. an die noortsijde die Leijdsche vaert ende an dat suijteijnde die Oude Zwette. Ende Andries voirsz. ende Mees Hovensz. sijn vader loveden mit gesamender hant ende elcx voir alle heer Pieter voirn. dese voirsz. gouden engelsche nobel tsaers vrij te waren jair ende dach alsoe recht is ende als men vrij renten op eijghen landen ende erven sculdich is te waren ende dat op te voiscr. achte morgen lants Andries voirsz. toebehoirende met meer en staet dan die voirsz. gouden engelsche nobele tsaers. Ende Andries voirsz. lovede Mees voirn. hier of schaedelois te houden. Voirt soe beliede hem Andries voirsz. hier of wel voldoen ende betaelt, den lesten penninc mitten eersten. In oirkonde desen brieve bezegelt mit onsen zegelen. Int jair ons heren duijsent vierhondert een ende tseventich opten zeven ende twintichsten dach in Septembri.

.....
Inventaris 0502-1091

Regest 2427 d.d. 24-10-1559.

Copie.

Ick Willem Adriaensz. schoudt inden ambochte van Soeterwoude doe condit allen luijden dat voer mijn ende twee getuijgen hier nae gescreven gecomen ende gecompareert is in propere persoone Jan Michielsz. woenende inden ambochte van Soeterwoude voorsz. ende bekende voor hem zijnen erven ende naecomelingen wel ende wettelicken vercoft te hebben ende sculdich te wesen die procuratoers vande heijlige eerwaerdige Sacraments broeder ende susterschap dat men hout in Ste. Panraes kerck binnen Leijden alsoe meester Cornelis Baroen Jansz., heer Gerijt Jans, heer Gerijt Claesz. ende heer Gerijt Jansz. wten Hage priesteren ende canonicken der kercke voorsz. ende den gene die naemaels procuratoers vant voorsz. broederschap wesen zullen totten voorsz. broeder ende susterschips behouff die somme van drie goude karolus guldens tsaers losrente tstick voer veertich comans groot gereeckent, te betalen alle jaers tot sinte Catherine dage binnen der stede van Leijden ten huijse ende in handen vande procuratoers vant voorsz. broederschap inder tijt wesende. Daer off teerste jaer rente verschijnen zel tot sinte Catherine dach als men scrijft duijsent vijf hondert ende tsestich ende zoe voort van jaere tot jaere tot sinte Catherine dach dese voorsz. renten te betalen ten daege ter plaetse ende in handen voorsz. Daer onder stellende hij comparant voorsz. tot eenen specialen ijpotheecke vijftalff morgen lants bijden hoop sonder maet, met huijs, schuij, barch, potinge ende plantinge daer op staende, gelegen inden ambocht van Soeterwoude voorsz. Ende heeft belent an die westzijde Jannetge Pieter Claes Meijnen wedue, an die noortzijde jonge Jan Cornelis zoon, an dat oosteijnde Huijch Lourijs zoon mit sijn evenknien, an die zuijtzijde Willem Willemsz., Sijmon Henricxz. ende Jan Maertzoen ende voorts qualicken ende specialicken alle die andere gueden die

hij comparant voorsz. nu ter tijt heeft ende hier naemaels vercrijgen mach waer off waer an die gelegen zijn off bevonden sullen mogen worden binnen den voorsz. ambochte off daer buijten geen gueden wtgesondert, omme bij gebreecke der voorsz. jaericxe betalinge daer an te versien ende te verhalen, mitsgaders de costen, schaden ende interest daer om geleden, soe wel als die principael rente met heerlicke ende reale executie vanden Hove van Hollandt ofte anders met sulcken recht die voern. procuratoers inder tijt wesende ofte actie van hem luijden vercrijgende dat believen sal. Voort zoe verclaerde Jan Michiels zoon voorsz. voor mijn Willem Ariaensz. schout voern. ende getuijgen nae gescreven als dat dese vijftalff morgen lants voorsz. nu ter tijt gheen ander belastinge en heeft dan dat opt voorsz. lant staet negen gulden ende eene stuver jaericxe losrenten ende op elcke morghen bijsonder van pacht dorthien stivers ende drie deuts. Willende tselffde (int noot waer) mit sijnen eede stercken. Des zijn voorwaerden dat Jan Michielsz. sijnen erve ende naecomelingen dese renten sullen mogen lossen tot zijnen believen tot eenenmale mit acht ende veertich karolij guldens tstuck van veertich comans groot met alsulcke renten als nae beloop des tijts verscheenen zullen wesen als die lossinge geschiet. Ende dat mit goet gecalueert gelt, te weeten den gouden carolij gulden off den nieuwe Phillips gulden bij onse connijnck van Spangien nieu geslagen voer veertich grooten vlaams, den silveren vlies voor zes groot, een stuver voor twee groot ende alle ander gelt naer advenant. In kennisse der waerheijt zoe hebbe ick Willem Ariaensz. schout voorsz. desen brief over Jan Michielsz. bezegelt. Int bijwesen van Aernt Ewoutsz. ende Dirck Claesz. buijrluijden inden ambochte van Soeterwoude voorsz. mit mijnen zegelen hier beneden an gehangen. Upten vier ende twintichsten dach in novembrij anno vijftien hondert negen ende vijftich. Ende was bezegelt met een groen wassen zegel aen een double franchijnen staerte wthangende.

Uijtgegeven ter griffe der stadt Leijden voor copie van zijne originele ende es desen naer collatie daer jegens gedaen met de zelve accorderende ende overeencomende bevonden huijden dezen lesten julij anno 1600 ende thien.

Was getekend: J. van Banchem.

Ick Jacob van Tetherode rentmeester vande goederen van tcappittel ten Hogelande hier ondergescr. bekenne mitsdesen den originelen brief daervan copie aucthentijcq hier vooren gaende es ter griffe deser stede gelicht ende intfangen te hebben. Actum ut supra.

Was getekend: J. van Tetherode.

.....